

ԼԵՒՈՆ ՄԱՆՈՒԷԼԵԱՆՑԻ

Կեանքը չէ տալիս ինձ հաւատ և յոյս,
Կեանքը չէ տալիս եռանդ իմ հոգուն,
Եւ ես նորանից էլ սիրտ, խրախոյս,
Տեսնում եմ, այժմ զուր եմ ըսպասում:
Եւ կանգնած է նա իմ առջեւ, ինչպէս
Յուսարեկ ծերուկ, զրգւած բոլորից,
Որ դարձնում է իւր խորշոմած երես
Ձեռքերը պարզած խղճուկ զաւակից.
Որդու մըմունջներ, աղաչանք և սուգ,
Փայփայանքների կարօտ խորագին—
Բայց ծերի դէմքին չը կայ արտասուք.
Նա անողոք է որդու տռաջին:

Հոգի իմ, կեանքից մի խնդրիլ իզուր
Յոյս, հաւատ, եռանդ, քաջալերութիւն.
Ո՞րտեղից նա տայ, երբ անյոյս, տըխուր
Հազիւ թըմրում է նորա գոյութիւն,
Երբ նա ինքըն էլ թըշառ ու դալուկ,
Փայփայման կարօտ՝ չէ գըտնում գըզանք.
Երբ լալ է ուզում—չը կայ արտասուք,
Երբ հառաչում է—չը կայ արձագանք:
Մի ցաւիլ, հոգի, և քո մէջ խեղաթր
Ամենայն կարօտ—սէր և յոյս և խանդ,
Եւ ներքուստ վառւած՝ գէթ գու ներշնչիր
Այս մեր խղճ կեանքին ջերմաջերմ եռանդ: